

蓮
堂
詩
話

四庫未收書

蓮堂詩話二卷提要

張金吾藏書志

元海昌祝誠輯誠仕履未詳卷下題賣墳牆壁
條有云至元丁丑以來則誠爲元人可知讀書
敏求記列之優古堂詩話前或誤以爲宋人歟
是書所論宋詩居多而唐與金元之作亦間及
焉名篇警句多有他書所未載者如卷上載金
海陵王哀宋姚將軍詩云獨領孤軍將姓姚一
心忠孝爲南朝元戎若解徵兵援未必將軍死

尉橋伏讀

御定全金詩錄海陵王詩五首此詩未經採入故表出
之末有題識云嘉靖壬子春連陽精舍錄成

蓮堂詩話卷上

海昌祝誠輯

續鴈詩

宋贛縣人王奇少爲縣吏令題鴈詩於屏云隻隻脚蘆
背曉霜盡隨鴛鴦立寒塘奇密續之曰晚來魚櫓驚飛
去書破遙天字一行令奇之因激使學後遊京師真宗
偶見其作召見賜第奇作詩云不拜春官爲座主親逢
天子作門生官至殿中侍御史

題驛舍

宋景定間林存爲潭州帥罷歸道經衢州調千夫荷擔
至趙清獻公抃墓傍疲甚因相與語清獻公一琴一鶴
那有許耶或聞之題詩驛舍曰千夫荷擔在山阿膏血
如何有許多不若扁舟徑歸去休從清獻墓前過

雲風和尚

宋僧自清紹興中居大山寺性疏狂屢被師責忽一日
謂師曰欲往京師見天子願假一乘師怒曰糞箕扛汝
去自清卽爲偈曰糞箕扛去轎擡回優鉢曇花向日開
但願老僧高著眼管教平地一聲雷已而辭去忽一日

乘傳而至奉敕重整山門賜號曰雲風和尚

題石壁

宋時僚宰祈雨於江西石壁山見一詩題於巖壁云洞
前溪入澗於苔洞口桃花撲面開轉頭望斷意不斷長
一簾須再來時墨尙未乾追尋不可得其人遂疑其

爲器云

湖神女

湖一觀

神能分風送客秦觀一夕宿湖傍借竹軒中

夢神女贈一詩云不知水宿分風浦何事秋眠借竹軒

聞道文章妙天下廬山對面可無言

休官詩

宋孫冕新淦人守蘇州甫及引年大書一詩於壁曰莫
待朝廷差致仕蚤謀泉石養閒身題畢拂衣歸九華山
再召竟不起

鈴岡

唐張景修有題鈴岡詩江抱羅邨蟠玉帶池開石井湧
銀濤佳句也

讀華嚴經

宋僧普庵姓余宜春人住慈化寺嘗讀華嚴經豁然大
悟作偈曰捏不成團撥不開何須南嶽與天台六根門
首無人用惹得胡僧特地來後累有異僧至相與問難
一旦遂能默記知未來事

米困銘

宋王鴻雱都人博學工文篆隸艸書皆妙皇祐中試南
宮不利遂歸隱作米困銘曰夫竊人之食而不任其事
又騷然而爲害者鼠也人之物而不知有畏又肆然
而不足者虎也吾暴而不忍爲虎竊而不忍爲鼠寧守

斯廩以安吾處

題梅嶺

唐一婦人題於梅嶺曰妾幼侍父任英州司寇旣代還以大庾有梅嶺之名而反無梅遂植三十本於道而題詩曰英江今日掌刑回上得梅山不見梅輟俸買將三十本清香畱與雪中開

自容偈

宋僧德賢上猶人號棲真尊者治平間結庵羊山習禪元豐五年九月容自圖其忽於壁對衆說偈曰片雲歸

洞本無心流水下山非有戀言訖而化

頌汪知府

宋處州知府汪待舉爲政寬厚曲盡下情民有爭訟呼之使前面究曲直不以屬吏百姓以詩頌之曰官舍卻如僧舍靜吏人渾似野人閒

對上問

宋龍泉管師復自號臥雲先生仁宗召至問曰卿所得何如對曰滿塢白雲耕不盡一潭明月釣無痕臣所得也竟不受爵命

題百丈山

唐宣宗微時遯迹於江西奉新縣百丈山嘗題詩曰日月每從肩上過山河長向掌中看可謂豪壯矣

別張方平

宋慶厯中張方平知江寧府有政績先是方平在兩浙有道人李仕寧以詩別云異時復與公相見正是江南二月天及至江寧李自茅山來謁適值仲春也

金雞石

池州建德縣艸堂寺北有金雞石相傳唐羅浮過此題

詩曰金雞不向五更啼其石遂迸裂有雞飛鳴而去

哀姚將軍

金主亮南渡江宋將姚興拒於尉子橋力屈而死亮作
詩哀之云獨領孤軍將姓姚一心忠孝爲南朝元戎若
辭徵兵援未必將軍死尉橋

李斯立

宋李斯立居東山靈隱觀嘗從蘇東坡遊年踰八秩作
詩不凡如巖酒連雲凍谿梅帶雪香有意峰巒千嶂出
無名花艸百般香皆佳句也

朱佐日

唐朱佐日蘇州人仕爲御史工於詩武后嘗吟詩曰白日依山盡黃河入海流欲窮千里目更上一層樓問是誰作李嶠對曰御史朱佐日詩也

三詩僧

夷堅志曰吳中僧多能詩法具絕句云鶴鳴九皋秋夜永紙帳芙蓉臥鐙影九州之外更九州誰解摩心發深省蘊常詠石菖蒲詩云細水圍碁石纖纖手自移幾年離鴈蕩萬里到天池法平登北固樓詩云不負南徐眼

來看北固雲金焦兩山小吳越一江分三僧者皆勝流
有唐人風致

熙山錄

唐相陸希聲解印居常州宜興縣自號熙山君陽遁安
著熙山錄有潛蚪泉詩云蟠蛇小穴黑竅空潛伏幽姿
在此中又有鴻盤雲磴伏龜臺詩共□□七絕

沈彬虛冢篆

高陽沈彬隱居雲陽山後仕南唐以尙書郎致仕居丹
陽沈山學方外之術嘗手植一樹命諸子曰吾死葬此

及卒發之乃一虛冢石臺上有漆鐙一盞又有銅牌篆曰佳城今已閉雖開不葬埋漆鐙猶未滅畱待沈彬來

楚江漁者

唐楚江漁者以魚換酒輒自歌舞不言姓名江陵守崔鉉見而問之曰君之漁隱者之漁邪漁者之漁邪漁者曰昔姜子牙嚴子陵皆以爲隱者之漁邪殊不知不釣其魚釣其名耳

對上問

宋公安人張景仁宗召見問曰卿在江陵地有何景對

日兩岸綠楊遮虎渡一灣芳艸護龍洲曰所食何物對
日新粟米炊魚子飯嫩冬瓜煮鼈裙羹

隱山僧

隱山在湘潭縣西南一百十里山頂茅庵居開元中有
僧入見老僧出問難久之明日老僧火其庵遁去畱題
石壁云三間茅屋從來住一道神光萬境閒莫把是非
來辨我浮生穿鑿不相干

入對

宋攸州彭天益徽宗時入對上問曰攸州風景如何對

曰鸞山配鳳嶺金水對銀阡

七星巖詩

攸縣北八十里七星巖內有丹井石壁上有詩云跨鶴
升天去遺蹤四季寒七星巖下隱行滿已驂鸞相傳嚴
起升僊時所作

湘潭偶題

湘鄉縣北洗筆池唐褚遂良貶潭州都督行部至邑後
人爲立祠其上宋邑令爲榜曰唐大都督褚公洗筆池
咸淳間邑宰趙必槐於池中得斷碑上刻褚公湘潭偶

題詩云遠山嶺翠凝煙爛漫煙花二月天遊徧九衢
銚火夜歸來月挂海棠前餘皆莫辨

洞庭老人

夷堅志卓彥恭嘗遊洞庭月下有小漁舟過其旁卓呼
問有魚否應曰無魚有詩卓喜曰願聞一篇可乎老人
鼓枻徐去高吟曰八十滄浪一老翁蘆花江上水連空
世間多少乘除事良夜月明收釣簫欲邀喚之不可及
矣

畱題石壁

宋相陰縣人邵琥少遊太學遇至人後歸都嶠山艸庵
修煉東坡嘗訪之琥後遊□□西蜀峨嵋山遁去不知
所終畱題石壁云往往來來三十年更無蹤迹在西川
功成行滿升天去回首山頭月正圓

呂僊遺蹤

宋賈宗奭倅邵有古鏡甚寶之時聞有回處士善磨召
見風骨軒昂乃取藥堆鏡上處士曰藥少須歸取去不
復還遣人詢其處乃見太平寺門上有詩云手內青蛇
凌白日洞中僊藥豔長春須知物外煙霞客不是誠中

磨鏡人詩後題回道入宗奭驚歎其鏡上藥已化惟所
堆處一點表裏瑩徹

甘泉寺

湖廣常德府甘泉寺宋寇準南遷口題於東楹曰平仲
酌泉經此回望北闕黯然而去未幾丁謂又過之題於
西楹曰謂之酌泉禮佛而去後范諷畱詩於寺曰平仲
酌泉回北望謂之禮佛向南行煙巒翠鎖門前路轉覺
高僧厭寵榮後南軒張栻榜曰萊公泉

池亭詩

宋歐陽程營道人少貧爲郡吏郡後有池常淬鐵爲戎器名鐵作池植亭其旁一日太守於吏牘間得幅紙以紀池亭之勝有寒影倒吞凌漢樹冷光口浴半天星之句問知爲程語太守驚異之與之金使歸爲學登進士第累官屯田員外郎

復州作

宋王琪知復州有句云風迷楚客傷春野山晦荆王夢雨天人爭稱之

五鳳樓

宋韓洎自稱爲文是造五鳳樓手其兄浦得浣花箋爲詩以寄之十幅鸞箋出益州寄來新自浣谿頭老兄得此渾無用助爾添修五鳳樓

見志作

宋嚴大猷閩州蒼谿人時吳曦占蜀大猷作詩云笏未到身難擊泚兵如入手易擒吳後以特奏召授隆慶府司理參軍

清居山警句

唐姚昂嘗有蜀清居山詩云天設兩峯南北峭地盤一

水古今流警句也

題巫山神女廟

宋吳簡言長汀人以茂異決科爲詞部郎中有題巫山神女廟詩云惆悵巫娥事不平當時一夢是虛成只因宋玉閒脣吻流盡巴江洗不清是夜夢神女來謝

安樂山

唐先汪合江人七歲日誦萬言貞元中舉孝廉尋退居安樂山誦九經有題安樂山詩云碧峰橫倚白雲端隋代真人化迹殘翠柏不凋龍骨瘦石泉猶在鏡光寒一

身迴向天邊立萬壑皆從腳底看莫道煙消無路上但
看僊骨到非難其後宋開慶初有登進士曰先甲龍者
其裔也

瀘江亭

宋虞允文年方十歲侍其父漕潼川過瀘川亭乃題詩
曰暎水林巒影顛倒濟川舟楫勢崢嶸東行萬里欲乘
興更待一篇春水生

太原詩

閩中記永福縣東太原石有唐太初中邑宰潘君室人

王氏題詩云何事潘郎重別筵離情未斷妾心懸太原
灘下相思處猿叫青山月滿船今詩磨滅惟太原二字
在

唐明皇續薛令之詩

唐薛令之福建長谿人神龍初進士開元中爲東宮侍
講題詩於壁曰朝旭上團團照見先生盤盤中何所有
苜蓿長闌干元宗幸東宮見焉續之曰啄木嘴距長鳳
凰毛羽短若嫌松檜寒任逐桑榆煖令之用是謝病東
歸

莊君平

夷堅志云福州有道人嘗見老安同室歲餘告之曰吾乃漢莊君平也取一書授之天明安出不歸視其書皆修身度世之說今但記其語云事業與功名不值一杯水又云獨立秋江水

正覺偈

宋閩縣人有云僧本逸者出家至廬山依開元寺暹禪師入室頓悟元豐六年詔住大相國寺賜號正覺禪師紹聖中集眾而逝遺偈曰七十四年如掣電臨行爲君

通一綫鐵牛勃跳過新羅撞破虛空七八片

韓偓南遷

唐韓偓本京兆人爲翰林學士承旨昭宗時朱全忠怒其薄已斥偓罪欲殺之以鄭元規解乃止累貶鄧州司馬天祐初復召爲學士偓不敢入朝挈家南依王審知居南安有詩云此地三年偶寓家枳籬茅屋共桑麻

謝閩王

唐末詹君澤避亂遷閩隱居植德山下嘗詣閩王上書閩王昶欲畱之君澤以詩謝之曰周粟縱榮寧忍食葛

廬頓顧謾勞思

蚤春詩

宋王宗旦惠安人總角時祖禹錫命賦蚤春詩有就中
喜是龍門客躍出洪波只待雷之句當時皆器重之後
第進士知襄州

桂嶺

閩浦城縣北九十里有山舊名泗水嶺唐林鑑與弟蘊
登第經此題詩云長記嶺頭題姓字不穿楊葉不言歸
而今折得兩枝桂又向嶺頭聯影飛因改山名曰桂嶺

貶江州作

南唐江文蔚建陽人爲御史中丞坐貶江州奉其母以
行怡然不以貶謫爲意嘗作詩有曰屈原若遇高堂在
終不懷沙投汨羅

自讚

朱白玉蟾瓊州人嘗於黎居山中遇神人授制元雷法
後居武夷山嘗自讚云千古蓬頭跣足一生服氣餐霞
笑指武夷山下白雲深處吾家

聞雷

宋黃裳劍浦人少有大志元豐間郡之譙門一柱忽爲
迅雷所擊裳聞之口占云風雷昨夜破枯株借問天公
有意無莫是臥龍蹤迹困放教頭角入雲衢次年射策
果爲天下第一

采石弔李太白

宋胡璞閩中劍浦人嘗經采石渡題詩弔李白云抗議
金鑾反見讐一坏蟬蛻此江頭當時醉弄波間月今作
寒光萬里流蘇軾見之疑唐人所作歎賞不置

上官道人偈

上官道人臨終作偈曰處世紅塵五十八混世獨存今
始沒時人若問吾歸處埽盡雲霞一輪月

綏氏山詩

宋鄭文寶閩中興化人太平興國中進士累官工部侍
郎嘗題綏氏山云秋陰漠漠秋雲輕綏氏山頭月正明
帝子僊飛處馭遠不知何處夜吹笙又題綠野堂云水
煖鳬鷺行哺子谿深桃李臥開花歐陽修稱其不減於
王摩詰杜少陵

白鷺僊女

宋高化劉安女育於雍熙初九齡與羽人談道得度及
笄許妻何氏子劉氏送之忽有一白鷺自空而墜劉女
乘之而去陳軒詩曰白鷺乘去人何在青鳥飛來信已
遙若使何郎有僊骨也須同引鳳凰簫

囊山詩

興化囊山有辟支文殊二叢須彌施蟲二臺山之南有
放目亭北有蘸綠亭亭之前各有池又有降龍澗伏虎
巖唐王潛詩曰山有重巖寺門開兩徑斜谿聲湍走澗
海色月流沙嶺外曾馴虎堂中舊雨花不知□□地一

一落誰家

上賜詩

宋薛奕熙寧中武舉第一神宗賜以詩一方文武魁天下
萬里英雄入彀中之句後奕死於國事

荅鍾王使者

僧寂名耽章年十九入靈石山南平鍾王嘗盡禮徵之
不赴但書付使者曰拾殘枯木倚寒林幾度逢春不變
心樵客見之猶不采郢人何事苦搜尋

慕先守

宋蘇爲知邵武軍政尙清簡在郡有詩人所傳誦後袁
穀作守讀其詩因爲詩云手掬樵谿塵可濯恨無雄筆
繼蘇爲又云滄浪不須濯纒上本無塵

元夕鐙詩

宋黃通邵武人嘉祐初進士韓琦范仲淹薦其才除大
理丞每浩歌長嘯衆目以爲異人有爲元夕鐙詩云誰
將萬斛金蓮子撒向皇都一夜開通以詞語未壯自作
云秦樓十二玉梯橫紫府千門夜不扃疑是姮娥弄春
色彩雲移下一天星其雄俊如此

荅人

宋馮觀國邵武人遊方外自號無町畦道人寓宜春言
人吉凶盡驗或人誚其醉狂觀國以詩謝之曰踏徧紅
塵四百州幾多風月是良儔朝來應笑酡顏客道不相
侔風馬牛紹興中端坐而逝郡守李觀民爲塑其象於
治平觀

寄友人

宋王希旦長樂里人號支離子居九龍觀熙寧中化形
於太乙宮後復見於蜀有詩寄友人云昔遊西太乙今

日反成都若問去來事雲藏月影孤

□□人

唐周匡著及弟匡物閩之漳州龍谿人前後登第漳郡
登科者始於匡著兄弟與潘存實吳偉明張登慕容韋
俱有詩名潘存實梁山詩云盤根來楚蜀作鎮表甌閩
吳偉明云梁山重回首翠峯三十六慕容韋題蔡岡嶺
云閩越曾爲塞將軍舊置營我歌胡感慨西北望神京
張登云孤高齊帝石瀟灑晉亭峯皆佳句也

霍山懷舊隱

宋龍州人藍喬舉進士不第乃隱於霍山常吹鐵笛賦
詩云太乙峯前是我家滿牀書史足生涯春深帶酒不
歸去老卻碧桃無數花一日飛升而去後有人見之洛
陽

初一夜月詩

本朝蘇福潮陽人幼穎悟絕人出口成章若有神助八
歲時嘗賦月詩其初一夜月詩云氣朔盈虛又一初姮
娥底事半分無卻於無處分明有恰是先天太極圖他
作皆稱是年十四歲卒

吹角老兵

宋紹興初廣東高州有吹角老兵忘其姓名一日題詩
譙樓上曰畫角吹來歲月深譙樓無古亦無今不如歸
我龍山去松柏青青何處尋遂遯形不知所終

贈丁謂之

宋丁謂與劉遜往來一日遜作詩贈謂有他時駕口遊
滄海同看蓬萊島上春之句謂莫曉其意及南遷遜見
之於崖上謂方悟之乃知遜異人也與之泛舟海上而
飲且曰成子之詩意也

贈韓迴

宋昭州人韓迴號東山野叟累官太子中舍致仕李師中以詩贈之曰未衰前已得懸車骨立清風六十餘松竹最宜頻宅舍江山偏照白髭鬚

贈林次齡

宋林次齡淳熙中知貴州有政績部使者嘗贈以詩云戶長盡蠲民不病室家相慶酒頻沽農桑課績無遺恨循吏聲名徧兩都

漳州避地詩

宋曾幾贛州人號茶山居士建炎初避地於潯州嘗有
詩云雞犬圖書同一舸老夫蕩槳兒扶舵潯江一繫欲
生根夢下湖南向江左

醉題客舍

宋王稚川元豐初調官京師寓家鼎州親年五十餘矣
嘗閱貴人家歌舞醉歸書其旅邸壁間云鴈外無書爲
客少蛩邊有夢到家多畫堂玉佩繁雲響不及桃源欸
乃歌

送人

北夢瑣言徐月英有送人詩云枕前淚與階前雨隔箇
閒窗滴到明真衷情之句也

般若頌

法眼禪師金剛經四時般若頌曰理極忘情謂如何有
喻齊到頭霜夜月任運落前谿果熟衆猿重山長似路
迷舉頭殘照在原是住居西此謂道在邇而求之遠也

睡鴨詩

黃山谷睡鴨詩曰山雞照影空自愛孤鸞舞鏡不作雙
天下真成長會合兩鳬相倚睡秋江葢取鴛鴦賦曰山

雞照水那相得孤鸞照影各成雙天下眞成長會合無
勝比翼兩鴛鴦山谷非蹈襲此也以徐語弱故爲點竄
耳正如臨淮王思郭汾陽部曲一經號令□□益精明
云又庾信詩曰青田松上一黃鶴相思樹下兩鴛鴦無
事交渠更相失不及從來莫作雙亦同此意唐吳融池
上雙鳬詩意亦然但語陋耳

戲荅王定國題門絕句

朱黃山谷戲荅王定國題門云非復三五少年日把酒
饋春頰生紅白鷗入羣頗相委不謂驚起來賓鴻委者

諳識也詩起猶據言唐薛逢語新進士曰老婆三五少年時也曾東塗西抹來山谷此意當是往見定國不遇而姬妾有避之者來鴻或是其名字

江雨

春半平江雨圓紋破蜀羅聲眠篷底客寒溼釣來蓑此唐杜牧之作也黃山谷酷愛而屢稱之

困哀閩

唐顧況嘗作困哀閩詩云郎罷別困吾悔生汝困別郎罷心摧血下隔地絕天及至黃泉不得在郎罷前蓋青

箱雜記云閩人謂父爲郎罷謂子爲囝也

芭蕉詩

一種靈苗異天然體性虛葉如斜界紙心似倒抽書此
唐人路德延之作也見唐餘錄

古樂府

古樂府云繡幕圍香風年節朱絲桐不知理何事淺立
經營中護惜加窮務隄防記守宮今日牛羊上北隴當
時近前面發紅故山谷詩借用云今日牛羊上北隴當
時近前左右嘖

輓詞

朱黃山谷作叔父給事廉字夷仲輓詞云元祐宗臣考
十科公居八九未爲多功名身後無瑕點孝友生知不
琢磨宗臣謂司馬溫公蓋溫公爲相乞以十科舉士一
曰行義純固可爲師表二曰節操方正可備獻納三曰
智勇過人可備將帥四曰公正聰明可備監司五曰經
術精通可備講讀六曰學問該博可備顧問七曰文章
典嚴可備著述八曰善聽獄訟盡公得實九曰善治財
賦公私俱便十曰練習法令能斷情讞

金雞赦

唐李太白詩何日金雞赦回宋楊文公談苑云杜鎬言肆赦金雞不知起於何代關東風俗傳云司馬膺之曰案海中星占天雞星動爲有赦蓋王者以天雞爲度隋書刑法志北齊赦日則武庫令設金雞乃鼓於閭闔門或云起於西涼李光未知孰是究其旨西方金主兌兌爲澤雞者翼之神翼爲號令赦日合是二物判其形揭於長竿使衆人覩之也

底事

宋黃山谷詩云人鮓甕頭危萬死鬼門關外更千岑問
君底事向前去要試平生鐵石心任淵曰顏師古匡謬
正俗云問曰謂何物爲底丁見反底義何訓荅曰此本言
何等物其後遂省促言直云等物耳音都禮切又轉丁
兒反應璩百一詩云用等稱才學以是知去何而稱等
其來已久今人不詳根本乃作底字非也

潘邠老

宋曾慥端伯詩選云張文潛晚喜樂天詩邠老聞其稱
美輒不樂嘗誦山谷十絕句以爲不可跂及其一云老

色日上面歡情日去心今既不如昔後當不如今文潛
一日召邠老飯預設樂天詩一帙置書室枕席閒邠老
少焉假榻翻閱良久才悟山谷十絕詩盡用樂天大篇
裁爲絕句蓋樂天長於敷衍而山谷巧於剪裁自是不
敢復言

佛氏經語

唐寒山子松詩云有樹先林生計年逾一倍根遭陵谷
變葉爲風霜改咸笑外凋殘不憐內文采皮膚旣脫胎
惟有真心在又壽禪師詩欲識永明旨門前一湖水日

照光明生風來波浪起皆用釋氏經語也

竹石請荅

唐盧仝石請客詩竹弟雖讓客不敢當客恩自慚埋沒
久滿面蒼苔痕又石荅竹曰蒼蘚映我面雨露皴吾皮
此故不嫌我突兀蒙相知雖類俳優亦可□□

荷葉罩芙蓉

青箱雜記曹修古詩云荷葉罩芙蓉圓青映嫩紅佳人
南陌上翠蓋立春風

戲荅史應之

宋史應之眉山人落魄無檢喜作鄙語人以屠儉目之
故黃山谷贈以詩多用屠家事曰先生早擅屠龍學袖
有新礪不試刀歲晚亦無雞可割庖蛙煎鰾薦松醪蓋
應之授館於人爲童子師故引前輩詩來朝爲送先生
飯一夜沿谿捉鰾魚與唐人郭受詩松醪酒熟旁看醉
等語以戲之

優曇花

唐釋貫休詩云夜雨山艸滋爽籟雜枯木閒吟竺僊偈
清絕過於玉蟋蟀鳴壞牆苟免悲局促道人優曇花迢

迢遶山綠蓋優曇鉢名瑞應三千年一見見則金輪王
出也

陳後主詩

南史陳後主從隋文帝東巡賦詩曰日月光天德山河
壯帝居太平無以報願上東封書

麀公詩

宋蘇東坡寄麀公詩云滿院秋光濃欲滴老僧倚杖青
松側只怪高聲問不麀嗔予踏破蒼苔色

病起荆江亭卽事

雲無俗狀引得白頭翁時時來倚杖故山谷有和章云
苦雨已解嚴諸峯來獻狀不見白頭禪空倚紫藤杖

李花

唐李義山李花詩云自明無月夜強笑欲風天又嘲桃
詩云無賴天桃面平明露井東春風爲開了卻擬笑春
風非有爲而然邪

嘲羅娘

隋煬帝幸廣陵後賦詩多效吳語故嘲羅娘詩云幸好
畱儂伴成夢不畱儂住意如何

思歸樂

唐元稹謫江陵有思歸樂詩云山中思歸樂盡作思歸
鳴應緣此山路自古離人征故白居易和云山中不棲
鳥夜半聲嚶嚶似道東歸樂行人掩泣聽

治顰酒

晉李潛字社公爲兵部時文公昉爲翰林學士每月給
內醢兵部因春社寄昉詩云社公今日沒心情爲乏持
顰酒一瓶蓋俗云社日酒治顰持當作治平聲

江西治舟後作

宋莆田李才仲甫泊舟江西太和書船板上云江水冥
冥沙石陰一舸行盡春已深浪花綠蔓曳錦帶短蘆刺
水抽玉簪飢魚未沈波面簫小舫正橫谿上風清輝濯
淨遠山碧白鳥飛入蒼煙叢

字眼

宋黃太史夜宿分寧寄杜潤安詩云陽關一曲水東流
銕火旌陽一釣舟我自只如常日醉滿川風月替人愁
句法清絕然歐陽公別滁州亦云我欲只如常日醉莫
教絃管作離聲杜牧詩蠟燭有心還惜別替人垂淚到

天明王介甫亦云只有月明西海上伴人征戍替人愁
若此之句多多益善

桃花偈

福州靈雲志勤禪師初在潯山因桃花悟道有偈曰三
十年來尋劍客幾逢落葉幾抽枝自從一見桃花後直
至如今更不思

潘祐

湘山野錄潘祐有詩云只因騎折玉龍腰謫向人間三
十六

平原郡齋

宋黃太史有平原郡齋二首云老作儒生不解事江南
有田歸荷鋤北窗風來舉書葉猶似勸人勤讀書黃落
委庭觀九州蛩聲日夜戒衣裘金錢滿地無人費一斛
明珠惹苾秋邢敦夫有和章云木落天高憶舊居幾時
歸去帶經鋤黃花爛漫無人折柿葉翻紅正好書目送
愁雲盡日愁寒來著破舊貂裘憑誰說與西風道畱取
花開點綴秋

語谿弔古

唐元結次山嘗愛潯谿山因居之其子友讓乃作潯谿
弔古詩云昔到才三歲今來鬢已蒼剝苔看篆字薙艸
覓書堂引客登臺上呼童掃樹旁石渠疏壅水門徑刷
叢篁田地全更主林園盡廢荒悲涼問耆耄疆界指垂
楊

贈趙景平

泊宅編明道伊川衣服異人衫則大袖巾則闊幅元祐
間人皆效之至紹聖中猶有襲之者趙景平其門下士
也張文潛贈詩云明道新墳艸已春遺風猶見有門人

定知魯國衣冠舊盡帶林宗折角巾

贈李泌

唐鄴侯傳時李泌方絕粒上自燒梨以賜之潁王等請
聯句爲他年故事潁王曰先生年幾許顏色似童兒信
王曰夜抱九僊骨朝披一品夜。汴王曰不食千鍾粟惟
餐兩顆梨上曰天生此閒氣助我化無爲

訪蔣居士

宋紹定己丑中秋後十日忽一道士青巾黃服至永州
祁陽符山訪居士蔣暉曰佳山水爲我取鍼石來居士

入室取鉞石出而不知道士所往但見壁間題曰燕罷
高歌海上山月瓢承露浴金丹夜深鶴透秋雲碧萬里
西風一劍寒尾題無上宮主訪蔣暉蓋宮無上者呂也
其呂僊洞賓乎後人刻詩於石今存

鑿鑿鼓

雍洛靈異小錄唐馬周上言令金吾每街懸鼓夜擊止
其行李以備竊盜時人因呼爲鑿鑿鼓也道士裴修戲
爲詩曰遮莫鑿鑿鼓須傾滿滿杯金吾若相問報道玉

山頽

蓮堂詩話卷上終

蓮堂詩話卷下

海昌祝誠輯

棄官歸隱

自警編云詩人類以棄官歸隱爲高而謂軒冕榮貴爲外物然鮮有踐其言者故靈澈荅韋丹云相逢盡道休官去林下何曾見一人蓋譏之也趙嘏云蚤晚麤酬身事了水邊歸去一閒人若身事了則仕進之心益熾愈無歸期矣王易簡云青山得去且歸去官職有來還自來是豈須與忘情於軒冕邪張乖崖在蜀有一幕官不

爲乖崖所禮遂獻詩云秋光都似官情薄山色不如歸
興濃公謝而畱之彼蓋有激而云豈誠心哉筆談有言
武人忽作詩云人情本無累何必買山錢遂棄官歸此
最勇決余嘗於驛壁間見人題兩句曰人生侍足何時
足未老得閒方是閒余深味其言服其精當而愧未能
行也此與夫一日看除目三年損道心者異矣

貴壽

宋朝大官最享高年者三人曰太傅張公士遜樞相張
公昇少保趙公概皆壽至八十六又二人次之曰陳文

惠公薨佐至八十二杜祁公銜至八十一又次之曰富
文忠公彌壽至八十餘皆不及焉故文惠致政以詩寄
太傅曰青雲岐路遊將徧白髮光陰得最多蓋謂是也

睢陽五老

宋杜衍字世昌慶厯中大拜時稱清白宰相封祁國公
至和中退居睢陽與馮平王煥畢世長朱貫咸以耆德
挂冠優游桑梓暇日宴集爲五老會賦詩唱和錢明逸
爲序云蹈榮名而保終古卻貴勢而躋遐耆者白首一
節人生所難杜公詩云五人四百有餘歲俱稱分曹與

蓮堂詩話

挂冠天地至仁難報補林泉有志許盤桓花朝月夕隨時樂雪鬢霜髯滿座寒若也睢陽爲故事何妨列向畫圖看馮和云醉游春圃煙霞煖吟聽秋潭水石寒朱詩云各還朝政逼堯年鶴髮俱宜頂道冠乍到林泉能放曠全拋簪笏尙盤桓畢詩云篇章奉和慚風雅眷待優隆荷歲寒云云歐陽永叔借觀五老圖次韵云脫遺軒冕就安閒笑傲止園縱挂冠白髮憂民雖種種丹心許國尙桓桓鴻冥得路高難慕松老無風韵白寒聞說優游多伴和新詩何惜盡傳看

洛社耆英會

宋文潞公彥博元豐九年畱守西都年七十七時富韓公年七十九致仕在里第二公弼亮三朝爲國元老與席司封汝言王尙恭趙南正劉純馮行已楚建中王不疑王拱辰張昌言張燾十二人爲耆英會于韓公之第買酒相樂圖於妙覺僧舍司馬溫公年未七十亦與焉潞公命溫公序其事洛陽多名園古剎水竹林泉之勝諸老鬚眉皓白衣冠甚偉洛陽太平盛事也諸公皆有詩潞公詩云九老舊賢形繪事元豐今勝會昌春垂肩

素髮皆時彥揮塵清談盡席珍染翰不停詩思健飛鴈
無算酒行頻蘭亭雅集誇修禊洛社英遊賞序賓自愧
空疏陪几杖更容欸密奉簪纓當筵尙齒猶多幸十二
人中第二人溫公詩曰洛下衣冠愛惜春相逢小飲任
天真隨家所有自可樂爲具雖微誰笑貧不待珍羞方
下筯只將佳景更娛賓庾公此興知非淺藜藿終難作
主人潞公請老致仕後再起平章軍國重事制書云呂
望惟賢起佐文王之治周公已老畱爲孺子之師繼而
請老復以太師致仕年九十二壽獨高於諸公富公入

十詩云西洛古帝都衣冠走集地大尹吾舊相曠懷輕
富貴云云趙丙詩云新春鼎茗宴英髦主禮雍容下庶
僚二相比肩官一品十人華髮任三朝星階並立瞻台
曜尊酒時行挹斗杓東顧庸夫最無狀也將顏面赴嘉
招劉純詩云偶以暮年陪盛宴喜將白髮照青春年七
十五馮行已詩云自愧樛櫟非遠器誰知齒髮亦遐年
詩多不錄 文公又與程珣司馬旦席汝言作同甲會
皆年七十八各賦詩一首

真率會

蓮堂詩話

司馬公君實招諸公于南園爲眞率會用安之韵作詩
曰榆錢零亂柳花飛枝上紅英漸漸稀莫厭銜盃不虛
日須知其力惜春暉眞率春來頻宴聚不過東里卽西
家小園容易邀佳客饌具雖無亦有花木集云三月二
十六日作眞率會伯康君從皆七十八歲王安之七十
七歲正叔七十四歲不疑七十三歲叔達七十歲溫公
六十五歲合五百一十五歲溫公再用前韵成詩云七
人五百有餘歲同醉花前今古稀走馬鬪雞非我事紵
衣絲髮且相暉經春無事聯翩醉彼此往來能幾家切

莫辭斟十分酒儘教人笑滿頭花真率會約曰一序齒
不序官一爲具務簡素一朝夕不過五味一菜果脯醢
之類各不過三十器一酒巡無算深淺自斟主人不勸
客亦不辭逡巡無下酒時作菜羹不禁一召客共作一
簡注可否於字下不別作簡或因事分簡者聽一會日
蚤赴不待促一違約者每事罰一巨觥

甲月日押
元豐十年

生日

吳叔經代人上黃耕安太夫人壽乃三月十四日也其
詞曰天邊將歸一輪月世上還鍾百歲人識者謂若十

三日亦使得不得云猶欠一分月方見得十四日也嘗
見樂人聖壽致語初用老子長上古而不老對董仲舒
歷萬世以無弊固似云好然不老二字乃是語句豈若
詩人婉其詞云永錫難老多少委曲和緩又如天子萬
年如南山之壽俾爾壽而臧皆曲盡祝壽之意也

伊川生日致齋恭肅不事飲宴歌樂蓋念勛勞之力今
人誕辰極意歡娛其壽詞多用律呂體狀其月蓂莢形
容其日然蓂莢若在月半前則日長一葉乃是增數爲
美若在月半後則日凋一葉乃是減數實爲語忌烏可

使也用事當嚴又要脫俗方是作家且如八月十六日
生辰有人作歌曰作夜萬家齊笑語祝君千歲共團圓
又如一僧上秦師垣壽曰不祝公兮椿與松椿松老大
無不空不祝公兮鶴與龜鶴龜汨沒徒雲泥祝君願作
天上月歲歲年年常皎潔錦城初動五更鐘引領衆星
朝北闕秦公大悅

漁家傲詞

樂城公悟悅禪定門人有以漁家傲詞祝公生日言及
濟川公以非其志也乃和其詞云七十餘年真一夢朝

來壽學兒孫奉憂患已空無復痛心不動此間自有千
鈞重早歲文章供世用中年禪味疑天縱石塔成時無
一縫誰與其人間天上隨他送

宮詞

元豐初宦者王紳效王建作宮詞百首進之頗有意思
其太皇太后生日詩云太皇生日寶尊榮獻壽宮中未
五更天子奉觴仍再拜寶慈侍立到天明寶慈太后宮
名也又太后幸景靈宮駕前露面雙童女詩曰平明綵
仗幸靈宮紫府僊童下九重整頓瓏璚時駐馬畫工暗

地貌真容

溫公詩話

壽劉侍郎

程滄海壽後谿劉侍郎詩曰朱顏白髮炯雙瞳一念平生造物通內閣圖書真學士西園几杖老僊翁木公金母人間現桂子桐孫壽籍通遙想綵衣圍四世後谿無日不春風

怡軒壽母詩

又見梅妝碧玉枝弟兄相聚著萊衣西方佛慶明朝誕南極星騰壽日暉百歲阿婆開九秩兩房孫子戲重闈

年年得侍高堂醉對坐天花散漫飛

壽詞

辛稼軒壽趙茂中郎中時以置廣濟倉賑濟除直祕閣
泌園春云甲子相高亥首曾疑絳縣老人看身長玉立
鶴般風度方頤鬚磔虎樣精神文爛卿雲詩凌鮑謝筆
勢駿駿更右軍渾餘事羨僊都夢覺金關名存門前父
老欣欣換奎閣新褒詔語溫記他年帷幄須依日月只
今劍履快上星辰人道陰功天教多壽看到貂蟬七葉
孫君家裏是幾枝丹桂幾樹靈椿又呈茂中賑濟事滿

江紅云我對君侯長怪見兩眉陰德更長夢玉皇金闕
姓名僊籍舊歲炊煙渾欲斷被公扶起千人活筭胷中
除卻五車書都無物谿左右山南北花遠近雲朝夕看
風流杖履蒼髯如戟種柳已成陶令宅散花更滿維摩
室勸人間更住五千年如金石

又感皇恩慶嬪母七十云七十古來稀未爲稀有須是
榮華更長久滿牀袍笏羅列兒孫新婦精神渾是个西
王母遙想畫堂兩行紅袖妙舞清歌擁前後大男小女
逐个出來爲壽一个一百歲一盃酒

張孝祥慶母夫人鷓鴣天云帝里風光別是天花如錦
繡柳如煙還逢令節春三二又慶慈幃壽八千斟壽斝
列長筵子孫何以詠高年各裒千首西湖什一度生朝
獻一篇

壽詩

王介甫壽曾魯公詩云翊戴三朝冕有蟬歸榮今作地
行僊且開京洛蕭何第未泛江湖范蠡船老景已憐周
呂尚慶門方似漢韋賢一觴豈足爲公壽願賦長鯨吸
百川

余觀方萬里選詩有云如生日詩多諛詞不如人意故
皆略之余近觀元人壽詩卻多佳者今錄數首於右以
備采覽云趙孟頫壽平章李韓公云瑞鍾光嶽應時需
日上天衢手自扶八表同春開壽域五雲異采映台符
經綸至治歸賢相陶冶斯文屬大儒爲國白頭身未老
掌中行見有明珠 壽王趙公八十云儒僊彌節下蓬
瀛宴處超然鶴骨清周室龍韜師尙父漢庭鳩杖賜桓
榮中州大國封全趙東閣賢良位列卿白髮同僚欣盛
事年年來此慶長生

傳若金壽王左丞詩云南極諸星映赤霄東風二月滿
青條焚香鳳閣春開宴鳴玉龍墀午散朝但使經綸齊
稷契不勞服食慕松喬日長自度昇平曲閒聽雲間合
九韶

楊載壽韶國公云可樂無如父母全旣賢且貴又長年
金壺賜出青雲上玉佩朝辭白日邊楚水論春猶五百
蟠桃稱壽必三千似聞黃綺歸來後長向山中作隱僊
王仕熙壽劉邢公云詔下金鑾第一廳春風湛露宴趨
庭嘉辰又綬蒼龍角仙侶同驂白鶴翎衛武高年猶入

相韋賢老日只傳經崆峒別有長生訣几杖凝香酒半醒

張翥壽臯齋左丞云六朝名德仰巍巍未許家園久息機霖雨帝方思汝作衮衣人更望公歸南山一柱推巾士左轄三星近太微欲問寶筵頌眉壽寸心遙與白雲飛

薛漢壽承旨張疇齋詩云鍾王書法得精微每日霜毫不厭揮相業曲江金鑑錄幽懷西塞綠蓑衣蟠桃開日三千歲古木參天四十圍應與赤松相約伴他年名遂

蚤知幾此用張氏故事又是一體

諺語的對

王丞相好諧謔一日與沙門論道因曰投老欲依僧有客對曰急則抱佛腳王曰投老欲依僧是古一句客亦曰急則抱佛腳是俗諺全語若上去投下去腳豈不對也

九僧詩

宋朝浮屠以詩名者九人有集號九僧詩今不傳其一曰惠崇最有佳句有進士許洞者善詞章俊逸之士也

因會諸詩僧分題出一紙約曰不得犯山水風雲竹石
花艸霜雪星月禽鳥之類於是僧皆閣筆洞咸平三年
進士及第時無名子嘲之曰張康禪裏蝨許洞鬧妝妻
是也

何斯舉

天聖中詔營浮屠姜遵在永興毀漢唐碑之堅好者以
代輒斲有一縣尉投書具言不可至於叩頭流血遵以
其故沮朝命按罷之自是人不敢言遵得進用何斯舉
詩云長安古碑用樂石蠶尾銀鉤擅精密闕訛橫道已

足哀況復鐫裁代輒篋有如天吳及紫鳳顛倒在衣吁
可惜斯舉黃州人少年識子瞻初名頴字韻之黃山谷
極重之改字斯舉又作黃絛襖子歌其序曰正月大雪
十日不已旣晴見日里人賀曰黃絛襖子出矣

道山清話

諷富韓公

洛中有一僧開堂說法司馬君實夜過邵堯夫云聞富
彥國呂晦叔欲往聽此甚不可但晦叔貪佛已不可勸
人亦不怪如何勸得彥國堯夫曰今日已暮矣姑任之
二人果偕往月餘後彥國招數客共飯堯夫在焉因問

彥國曰主上以裴晉公之禮起公公何不應命又聞三
遣使公皆臥內見之彥國曰衰病如此其能起否堯夫
曰上三命公不起一僧開堂以片紙見呼卽出恐亦未
是彥國曰炯亦不曾思量至此

道山清話

金鑾與玉峯書

歐陽景好交沙門有僧金鑾者來求作書與玉峯長老
于其舉保歐乃作一絕封與之云金鑾求與玉峯書金
玉相承價倍殊到底不關藤蔓事葫蘆自去纏葫蘆

贈僧

杜荀鶴有贈僧一詩云利名門路兩何憑百歲風前短
燄燈只恐爲僧心不了爲僧心了總輸僧蒙齋蔡正孫
云動靜勞佚係乎身之一心身靜而心役形佚而神疲
僧俗之相去不遠也此詩世之田夫野安樵童牧豎皆
能誦之可謂造理而有味者惜乎縉流之不能自覺耳
詩林

題僧寺

人之所誇與所仰慕皆不出本等唐杜牧之詣一僧寺
僧不識之人言其姓名亦不省故作詩云家住城南杜

曲旁兩株偃桂一時芳山僧都不知名姓始覺空門興
味長因爲之語曰毀譽但能驕本等利害但能動適用
同上

瞑坐

晁太傅迴謝事燕居獨處道院不治他事戒家人勿請
謁其夫人密覘之但見瞑目端坐鬚髮搖風凝然若木
偶嘗有詩曰鍊鐵成金得寶珍鍊精成性合天真相逢
此理交談者千百人中無一人

圓夢

沙門惠崇能詩有劍靜龍歸匣旗閒虎繞竿之句其尤
自負者河分岡勢斷一聯時人或譏其犯古又進士潘
閔戲謂曰爾當憂獄事吾昨夜夢爾拜我爾當歸俗耶
惠崇曰此乃秀才憂獄耳惠崇沙門也拜者倒也秀才
得無詣沙門島耶其敏捷若此

溫公詩話

論學

陸象山論太極之說不明朱文公曰某見延平因論象
山之學子靜說話當是兩頭明中間暗或問暗是如何
曰是他那不說破處他所不說破處便是禪鴛鴦繡出

從君看莫把金鍼度與人他禪家自愛如此

讀柳子厚詩

柳子厚晨詣超禪師院讀經詩云真源了無取矣迹世
所逐微言冀可冥繕性何由熟道人庭宇靜苔色連深
竹日出霧露餘青松如膏沐澹然雜言說怡悅心自足
詩眼云子厚詩尤深難識前賢亦未推重自坡老發明
其好學者方漸知之余嘗問人云柳詩何好荅曰大抵
皆好又問君愛何處荅曰無不愛者便知不曉矣識文
章者當如禪家有悟門夫法門百千差別真須先悟得

一處乃可通其他妙處向因讀子厚晨詣超師院一詩
至誠精潔之意森然在前其首四句蓋謂真妄以盡佛
理言行以盡熏修此外亦無詞矣道人庭宇靜苔色連
深竹又遠過竹徑通幽處禪房花木深之句日出霧露
餘青松如膏沐余家舊有大松偶見露洗而霧披真如
洗沐未乾染以翠色然後知此語能傳造化之妙至末
句則又言因指而見月遺經而得道於是終焉其本末
立意遣詞可謂曲盡其妙毫髮無遺恨者也

詩林

儻如壁

饒節德操撫州人祝髮名如璧號倚松道人住鄧州香
巖寺有一僕曰詹榮亦撫人璧攜之以行一日因打木
魚先悟道作頌曰木魚原來無肚腸聲聲喚我出鑊湯
佛法原來無多子王婆頭上戴丁香遂亦祝髮名如珪
云璧反於其僕處有省

艇齋詩話

曾艇齋云德操嘗爲余家丞相館客甚爲丞相內相兄
弟所知德操有高節而又能文其才在謝無逸諸公之
上晚年住香巖丞相之壻陳成季持節京西德操以詩
贈之云兩公待我以國士是時公亦同在門今日江頭

看使節令人泪溼漢江雲又寄無逸詩云雲山低處堪
投老文史他年不療窮富貴可求吾亦嬾眼看餘子化

王公其自負亦不淺矣

同上

德操作詩有句法若學賦其才情不愧其輩尤善作銘
贊古文其作佛米贊謂武將念佛以米記數得三升也
將軍念佛難於遣詞乃曰時平主聖萬國自靖不殺而
成不征而正矯矯虎臣無所用命移將東南介我佛會
久聞吾曹念佛三昧暗鳴叱咤化爲佛聲三令五申易
爲佛名一佛一米爲米三升自升而斗自斗而斛念之

無窮太倉不足此雖柳子厚之曲折不過是矣

題甘露寺

李衛公鎮南徐甘露寺僧有戒行公贈以方竹杖出大
國宛蓋公之所寶者及公再來問杖無恙否僧曰已規
圓而漆之矣公嗟惋彌日張表臣云余因在松江攝帥
幕暇日與同僚遊甘露寺偶題近作小詞於壁間云樓
橫北固盡日慙慙雨欸乃數聲歌但渺漠江山煙樹寂
寥風物三五過元宵尋柳眼覓花英春色知何處落梅
鳴咽吹徹江城暮脈脈數飛鴻杳歸期東風凝佇長安

不見烽起夕陽間魂欲斷酒初醒獨下危樓去其僧頑
俗且聒愀然謂同官曰方泥得一堵好壁可惜寫壞了
余知之戲之曰近日和尚耳明否曰背聽如舊余曰恐
賢眼目亦自來不認得物事壁間之題謾污壞之便是
甘露寺祖風也聞者大笑

珊瑚鉤詩話

贈道者

蘇東坡好道嘗有僧欲授以燒金之術而固辭後章聖
皇帝東封有賀元者得道不死謁於道左曰晉水部員
外郎賀元再拜徑去坡從喬同寄以詩云舊聞父老晉

郎官已作飛騰變化看。聞道東蒙有居處。願供薪水看
燒丹。至此又有真好之意。

與崔存

蘇舜欽字子美。長於歌詩。與梅聖俞齊名。晚號滄浪翁。
卒後崔存遇於王屋山間。曰。世傳學士儒矣。舜欽曰。瀛
洲召我。因詠詩曰。昆侖氣候四時春。紫府光陰夜如曉。
來時不用五雲車。跨著清風下蓬島。語畢遂飛去。後以
爲僊人。皆稱之也。

嘲林道士

廬山道士林完魁飲酒陷肉居九天使者廟一日忽有
鶴因風飄謁廟庭林乃驚起自謂當赴天召令山童捉
而乘之羽儀輕弱不勝其載毛傷骨折而斃處士陳沆
作詩嘲之曰陷肉先生欲上升黃雲踢破紫雲崩龍腰
鶴背無多力傳語麻姑借大鵬

題所居

陳桷待制紹興中嘗從諸大諸爲謀議官頗好修養之
方且自以爲得道嘗題所居曰神仙多是大羅客我比
大羅超一格乃被輕薄戲謔之人續其後云行滿三千

我四千功成八百我九百可發一笑也

庚緒詩話

神僊晏穎

晏臨淄臨川人其未生時有僊人曹八百見其父曰上
界有真人當降汝家其家素貧後臨淄貴顯其季弟穎
自幼警悟章聖皇后聞其名召入禁中因令作宮沼瑞
蓮賦大兒稱賞賜出身授奉禮郎穎聞之走入書室中
反關不出其家人呼之不應乃破壁而觀則已蛻去紫
上有紙書二小詩其一云兄也錯到底休誇將相才世
緣何日了了卻早歸來其二云江外三千里人間十八

年此行誰復見一鶴上遼天其年十八章聖御篆神僊
晏頴四字賜其家

道山清話

代簡

張天覺晚年好佛重道建華嚴關作醮籙會黃冠釋子
紛紛從之陳忠肅公瓘雖被其薦引然素未相識及通
書也至是代書簡之曰辟穀非其道談空去自然何如
勲業地無愧是神僊

守庚申作

程子霄有道之士也有一朝士夜會終南太乙觀拉程

同守庚申程作詩云不守庚申亦不疑此心只與道相依玉皇蚤已知行止任汝三彭說是非

馬自然

馬自然有吳行飲酒至一石不醉人有疾以雜艸木採與之食無不瘥者自吟云昔日僧隨魏伯陽經時醉臥紫金牀東君道我多情嬾罰向人間作酒狂又詩云何用燒丹學駐顏剛非城事靜非山時人若覓長生藥對景無心是大還唐廣明中於梓州上昇

以神守氣訣

蘇東坡云海上道人傳以神守氣訣因作詩記之云但
向起時作還於作處收蛟龍莫放睡雷雨直須休要會
無窮火常觀未盡油夜深人散後惟有一鐙留

題袁仲口所校參同契後

朱文公云余頃年經行順昌謁貧簪鏤見有題煌煌靈
芝一年三秀余獨何爲有志不就之語於壁間者三復
其詞而悅之不知題者何人適與余意會也慶元丁巳
八月七日再過其處舊題固不復見而屈指歲月怱怱
餘四十年此志真不就矣道間偶讀此書并感前事戲

趙絕句云鼎鼎百年能幾時靈芝三秀欲何爲金丹歲
晚無消息重歎簣簴壁上詩

朱文公又有和劉秀野導引詩云聞說牛刀久不更閒
中應接羨門生向來已悟藏千界今日何勞倒五行按
躋有時聊戲劇居心無物轉虛明舉觴試問同亭侶九
轉工夫蚤晚成按呂公詩云一粒粟中藏世界又道書
云五行顛倒迷龍從火裏出引用出此

黃覺

梅昌言出鎮太原黃覺送詩曰五馬雍容出鎮時都人

爭立看風儀文章一代喧高價忠直三朝受聖知帳下
軍容森劍戟門前行色擁旌旗雲籠古戍黃榆暗雪滿
長郊白草衰出去暫開貔虎幕歸來須占鳳凰池鬢間
未有一莖白陶鑄蒼生固不遲梅雅自修飾容狀偉如
大喜之黃覺仕不遂志因出郊會一道士取酒炙飲之
以酒水寫呂字知其爲洞賓也曰明年江南見君出懷
中大錢七其次十又小錢三日數不可益也又與藥數
寸令以酒磨服之可保一年無病覺如其言後藥盡作
詩曰牀頭歷日無多子屈指明年七十三果卒

毀元祐碑

元祐間修上清儲祥宮成命翰林學士蘇軾作碑紀其事坡叙事得體且取道家所言與吾儒合者記之大有補於治道紹聖元符間黨禁興遂毀其碑命學士蔡京別爲之文類三舍舉子經義程文耳正如唐時仆韓退之平淮西碑命段文昌改作後人有詩曰淮西功業冠吾唐吏部文章日月光千載斷碑人膾炙不知世有段文昌余於儲祥宮碑亦云後見韓无咎云是江子我詩庚谿詩話

哭張橫渠

張子厚橫渠先生卒門人欲謚爲明遠中予以質明道
明道以問溫公溫公復書曰子厚平生用心欲率世人
復三代之禮郊特牲曰古者生無爵死無謚爵謂大夫
以上也檀弓記禮所失以謂士之有諱自縣賁父始子
厚官比諸侯之大夫則宜謚矣然曾子問曰賤不諱貴
幼不諱長禮也惟天子稱天以諱之諸侯相諱猶爲非
禮况弟子而諱其師乎孔子沒哀公諱之不聞弟子復
爲之謚也今諸君欲謚子厚恐不合於古禮非子厚之

志與其以陳文範陶靖節王文中孟貞曜爲比其尊之
也曷若以孔子爲比乎程明道以詩哭之曰歎惜斯文
約共修如何夫子便長休東山無復蒼生望西土誰供
後學求千里聲名連棣萼二年零落去山北寢門痛哭
知何限豈獨交親念舊遊

祭文

前輩嘗說北狄致祭皇后捧持有祭文一封及楊大年
開讀乃空紙無一字隨自撰曰惟靈巫山一朵雲閨苑
一團雪桃源一枝花秋空一輪月豈期雲散雪消花殘

月缺伏惟尙饗仁廟大喜其才敏給有壯國體又如洪
忠宣公自嶺外徙宜春沒於保昌張子韶致祭其文但
云某年月日具官某謹以清酌之奠敢昭告於某官之
靈嗚呼哀哉伏惟尙饗盧景深美其情哀愴乃過於詞
二者情事相類要之詞意渾含言語脫俗此又倉卒之
所難也

輓樞府

樞府出知越州又移知鄆州其薨也岐公作輓詞云被
褐曾陳定羌策汗青猶著立儲書春風澤國吟箋落夜

雨谿堂宴豆疏前輩詩不獨語句精練且是著題

誄東坡

東坡夙李方叔誄之曰道大不容才高爲累皇天后土
知平生忠義之心名山大川還千古英靈之氣可謂簡
而當矣晁無咎夙張文潛銘之曰車堅馬良不得出門
策駑騁朽道上紛紛茲可悲耶

題賣墳牆壁

至元丁丑以來十數年間富豪零落殆盡祖墳蕪穢弔
祭不至自不忍言誰謂其禍又有出於思亭記之外者

近有士人見一名家出賣祖墳不勝其憤夜題詩於牆
壁次日觀者如堵賣者買者皆有愧色議中寢每讀其
詩語直而切以其有益於風教故錄於此庶可爲世俗
之戒也詩曰人家擇風水子孫百世計誰知後來者反
賣祖宗地商量寅夜掘醉後樂書契賣者固非人買者
亦惡類其地若果佳其家長富貴其人賣至此其地必
不利他時出子孫斷是效此例借曰異姓強造物豈私
意棺存且暴露無者骸骨棄後代轉日貧何時可埋瘞
安知泉下人銜冤不懇帝勿謂天茫茫禍患恐立至有

人心者宜于此焉變矣

哭東坡

潘邠老哭東坡絕句十四首其最盛傳者云元祐經綸
兩漢前典型竟得寵光宣裕陵聖德如天大誰道微臣
敢議天公與文忠總遇讒讒人有口直須緘聲名百世
誰常在公與文忠斗北南

神宗儉孝

宋神宗皇帝天性儉約奉慈壽宮尤盡孝道慈聖太后
嘗以乘輿御服未備因同天節作珠子鞍轡爲壽神宗

一御於禁中後不復用一日與兩宮幸後苑賞花慈聖
輦至神宗卽降步親扶屢卻不從聞者太息慈聖上僊
李奉世時爲時耶進輓詩有云珠羈昔御恩猶在玉輦
親扶事已非蓋紀此二事神宗覽之泣下

石林詩話

省試詩

薛能省試之夜賦詩曰白蓮千朶照廊明一片承平雅
頌聲更報第三條燭盡文章風景寫難成復齋漫錄曰
杜陽雜編言舒元興舉進士旣試脂炬三條人皆自將
以余考之唐制如此爾故廣記云唐制舉人試院日暮

許燒燭三條韋永貽試先畢作詩曰褰衣博帶滿塵埃
獨上都堂納卷回蓬巷幾時聞吉語棘籬何日免重來
三條燭盡鐘初動九轉丹成鼎未開殘月漸低人擾擾
不知誰是謫僊才又舊說舉場日晚試官權德輿於簾
下戲云三條燭盡燒殘舉子之心而舉子遽荅云八韻
賦成驚破試官之膽乃知唐制許舉子見燭三條也

詳定試卷

王荆公有詳定試卷詩云童子常誇作賦工暮年羞悔
有揚雄當時賜帛倡優等今日論才將相中細甚客卿

因筆墨果于爾雅注魚蟲漢家故事眞當改新詠知君
勝弱翁言詞賦非所以取士也又云文章直欲看無類
勲業安能保不磨疑有高鴻在寥廓未應回首顧張羅
言科舉不足以得士也然皆不可

手搏狀元

王詞宗宋太祖朝與趙昌言爭狀元上命二人手搏嗣
宗勝之故种放曰卿以手搏得狀元嗣宗嘗爲泰山司
理作詩云欲挂衣冠神武門先尋水竹渭南春卻將舊
斬樓蘭劍買得黃牛教子孫

舉子騎驢

唐憲宗咸通中以舉子侈吳衣服下令不許騎馬場中
不下千人街市皆跨長耳驢或以詩嘲之云今年敕下
盡騎驢短帽長鞭滿九衢清瘦兒郎猶自可就中愁殺
鄭昌圖以鄭身體肥大之甚故特譏之

與潘三失解後飲酒

蘇東坡詩云千金敝帚人難買半額蛾眉世世妍願我
自爲都眊瞶憐君欲鬪小嬋娟青雲豈易量他日黃菊
猶應似去年醉裏未知誰得喪滿江風月不論錢趙彥

材云撫言載唐進士失解醉飽者謂之眊眊今句云顧我自爲都眊眊則以不獨潘三失解爲有眊眊之愁而我所爲失意無一不是眊眊矣

送兄子孝恪落解南歸

陳無已詩云妙年失手未須恨白璧深藏可自妍短髮我今能種種曉妝他日看娟娟千金市帚能論價萬戶封侯信有年清白傳家有如此歸塗囊盡不畱錢蔡家齋曰此詩用東坡前詩第四句用唐人妝罷低聲問夫婿畫眉深淺入時無之意

送朱天錫

張景修字敏叔常州人余大父客也刻苦作詩典雅平易時多佳句元豐末爲浮梁令邑子朱天錫以神童應詔景修以詩送之天錫到闕會忘取本州公據爲吏部所卻因擊登聞鼓院繳景修所送詩爲證神宗一見大稱賞之翼日以語宰相王禹玉恨四方有遺才卽令召對禹玉言不欲一詩召人恐長浮競俟其秩滿赴部命之遂止比景修官滿神宗已升遐矣詩數千篇大父元祐自湖南憲請宮祠歸景修寄詩曰聞說年來清洞霄

江湖奉使久勤勞有神僊處閒方得用老成時退更高
借宅但須新種竹韋山想見舊栽桃浮梁居士塵埃甚
鬢髮而今也二毛其詩大抵類此流落無聞亦爲可惜
也

石林詩話

賀王丞相

五代王仁裕知貢舉王丞相溥爲狀元時年二十六後
六年遂相周世宗猶及宋朝以太子太保罷歸班年才
四十二前所未有也溥初拜相仁裕猶致仕無恙以詩
賀溥云一戰文場拔趙旗便調金鼎位無爲白麻驟降

恩何極黃髮初聞喜可知跋敕案前人到少築沙隄上
馬歸遲立班始得遙相見親洽會如未貴時溥在位每
休沐必過仁裕從容終日蓋唐以來座主門生之禮尤
厚今王丞相將明霍侍郎端友榜南省奏名時知貢舉
四人安樞密虛厚劉尙書彥修與今鄧樞密子常范右
丞謙叔吾亦忝與點檢試卷官鄧范不惟及見其登庸
可以繼仁裕且同在政府則仁裕所不及也

石林詩話

采侯詩

自科場用賦取人進士不復畱意於詩故絕無可稱者

惟天聖二年省試采侯詩宋尙詩祁最擅場有句云色
映塙雲爛聲迎羽月遲一作馳尤爲京師傳誦當時舉子
目公爲采侯

口占絕句

石曼卿官冊府時五鼓趨朝見二舉子繫邏舍憩曼卿
號呼請救因駐馬召邏卒問之曰昨夕里閭間有納婦
者二子穴隙以窺夜分被執曼卿力爲揮解卒長勉從
之二子叩頭拜於馬前曼卿按轡口占絕句以調之曰
司空憐汝汝須知月下敲門更有誰
叵耐一雙窮相眼

得便宜處落便宜

贈姜唐佐

蘇少公曰吾兄子瞻居儋耳瓊州進士姜唐佐往從之
游氣和而言道有中州人士之風子瞻愛之贈之詩曰
滄海何曾斷地脈白袍端合破天荒且告之曰子異日
登科當爲子成此篇崇寧二年隨計過汝陽以此句纔
示時子瞻之喪且逾歲矣覽之流涕乃爲足之云生長
茅間有異芳風流稷下古諸姜適從瓊管魚龍窟秀出
羊城翰墨場滄海何曾斷地脈白袍端合破天荒錦衣

不日千人看始信東坡眼目長
唐荊州每解舉人多不成名號曰天荒
至劉蛻舍人以荊州解及第曰破天荒
進士謝恩詩

魏了翁字華父宋慶元中進士第二人謝恩詩云聖皇
學問富春秋當宁宵衣謁壯遊鶴立雞袍天北闕龍飛
金榜殿西頭彤墀謬對三千字黃榜俄輪一二籌初學
龐知存大體紛更要說洛陽羞後知紹興府端平中樞
相號鶴山在靖州創鶴山書院聚友講書

送鄭萃先輩賜第南歸

歐陽公詩云少年鄉譽歎才淹六十猶隨貢士函握手
親朋驚白髮還家閭里看青衫閣涵空翠連衡阜門枕
寒江落楚帆試向塵埃勤斗祿何如琴酒老雲巖采之
人才不得一第老而不休觀此詩及梁灝得第之吟豈
但可以資老舉人之談笑亦足以勵仕進之志云

寄同年程泰之

周必大以秘書少監寓直翰苑發策試王仲衡嘗賦詩
寄同年程泰之云當年給札踏金鑾重到依然六月寒
學士策論學士策秘書官試秘書官自憐綠鬢非前度

尙覺青衫總一般寄語浙東程閣老莫矜紅旆笑儒酸
程荅詩末句云有底滑稽堪羨處金蓮燭裏話窮酸又
言余庚辰九月與程同試兩人名皆有太字程名大昌
明年試蔣芾芮煜姓名俱艸頭又明年試王東里程千
里名連里字頻歲偶記亦可書也

廣州勸駕

孟郊得第有春風得意馬蹄疾一日看徧長安花之句
氣味終短故劉後邨廣州勸駕詩乃云好陳董子三篇
策莫看唐人一日花不如翻案意新期多士者亦遠矣

登科佳句

登科佳句如陳元老云桃花穩過三層浪月桂高攀第一枝閩苑更無前進馬杏園都是後題詩劉禹錫云三忝省壁鸞遷榜一字天津馬渡橋王禹偁云青雲隨步登華榻紅雪飄香入杏園利市襴衫拋白紵風流名字寫紅箋鄭谷云丹霞照上三清路瑞景裁成五色毫韓持國云門開閭闔星河近榜注神僊姓字新楊誠齋云名登龍虎黃金榜人在煙霄白玉京少年已號萬人敵強仕初登千佛名楊正安云月中丹桂輸先手鏡裏朱

顏正後生皆新奇之的對也

新郎君

薛逢晚年厄于宦途策羸馬赴朝值新進士綴行而出
團司所由數十人見逢行李蕭然前導者曰違避新郎
君逢輾然遣介語曰莫貧相阿婆三五少年時也曾東
塗西抹來蘇東坡送蜀人張思厚殿試云雲龍山下試
春衣放鶴亭前送夕暉一色杏花三十里新郎君去馬
如飛用此語也

奉同年登第

王平甫謂宋匪躬太祝先輩示及劉貢父伯仲三人同年登第之詩曰奉一篇云六朝文物事當奇閎闊如今舉世推射策人爭看三虎薦書吾蚤識孤羆集英曉日傳來後瓊苑春風宴喜時莫羨絲綸歸世掌還聞驂隔鳳凰池原注太祝京西第一薦時余爲考官

論兵

劉貢父爲人好譎其詠史詩云自古邊功緣底事多因嬖倖欲封侯不如直與黃金印惜取沙場萬觸髅其後後村云貢父新詠詩往往指王韶李憲輩唐人曹松詩

亦是此意詩曰澤國江山入戰圖生民何計樂樵蘇憑
君莫話封侯事一將功成萬骨枯蔡蒙齋云張籍將軍
行云邊城親戚曾戰歿令逐官軍收舊骨磧西行見萬
里空幕府獨奏將軍功杜老云功名圖麟閣戰骨當速
朽劉潛出塞詞云死是征人死功是將軍功劉潛夫國
殤行云嗚呼諸將官日崇豈知萬鬼號陰風陸龜蒙築
城詞云城高功亦高爾命何勞惜此詩此意真足爲貪
功生事輕視人命者之戒

淮陰侯兵勝而不驕乃能師李左車此最奇特事荆公

故云將軍北面師降虜此事人間久寂寥李廣誅瀾陵
尉則薄於德矣東坡故曰今年定起故將軍未肯先誅
瀾陵尉用事當如此向背

曹南院爲秦帥唘氏方興舉國入寇公自出禦之戰于
三都谷大敗之唘氏遂褻其幕府獻詩云賢守新城蓋
世功臨危方始見英雄三都谷口全師入十萬胡塵一
戰空殺氣尙疑橫塞外捷音相繼徧寰中君王看降如
綸命旌節前驅馬首紅

貂蟬兜鍪

周盤龍以武功爲散騎常侍齊武帝戲之曰貂蟬何如
兜鍪對曰貂蟬出于兜鍪陳后山云其外父穎公罷相
建節出師太原其詩曰兜鍪卻自貂蟬出敢用前言戲
武夫李待制師中以相業自任常帥秦以事去其詩云
兜鍪不勝任猶可冠貂蟬

過孔寧極處士山居

韓持國詩云驅車上橫隴西秦龍陽道青陽人幾家綠
野山四抱鳥啼春意闌林變夏陰蚤知近先生廬民風
故淳好又別後懷寧極云雨滴庵上茅風亂窗外竹繁

聲夜入耳欲寐不得熟永懷歸田客石徑滑馬足連山
暗秋霧一鐙何處宿

艇齋詩話

謝范純夫

資治通鑑刊成賜執政從官及曾預編校者張芸安以
詩謝范純夫有云我投湘水五千里公滯周南二十春
純夫和云六世承平有史臣細書東洛布成均網羅遺
逸三千載筆削興亡十九春天作冠篇墳典大上思稽
古憲章新鳥臺御史詞誰校白頭今爲汗簡人

戲謔

元祐中黃山谷與趙挺之俱在館閣山谷以其魯人意
常輕之每庖吏來問食次趙必曰求日喫蒸餅一日聚
飲行令山谷云欲五字從首至尾各一字合成一字趙
沈吟久之曰禾女委鬼魏山谷應聲曰來力勅正整協
趙之音合座大笑趙又嘗曰鄉中最重潤筆每一誌文
成則太平車中載之以贈山谷曰想是蘿蔔與黃齋耳
趙銜之切骨其後擠排不遺餘力卒致宜州之貶宋紹
興中游操與潘良貴沈介洪景伯俱爲秘書省正字同
日赴館職少監秦熹於食次出對曰潘游洪沈泛瀛洲

時未有對後有以絳繹繪維綰綸綽爲對蓋取熙寧中
韓絳陳繹韓維楊繪相先後除學士也

田稷宋眞宗朝爲饒州判官丁晉公爲倅稷以片紙書
至丁假緡五鐲晉公曰榜下新婚京國富室豈無半千
質物耶懼吾輓之耳就於簡尾書還曰欺天行富吾何
有立地機關子太乖五百青蚨兩家缺赤紅崖打白紅
崖

陳季常妻柳氏甚悍而莫能制東坡作詩戲曰誰似龍
江居士賢談空說有夜不眠忽聞河東師子吼拄杖落

手心茫然此用佛經牟尼佛生兜率天分手指天地作
師子吼聲坡取此

唐羅隱與鶴雲同謁淮南高駢雲爲人素雅重而隱性
傲高公驅之去因譚隱曰青蠅被扇扇離席隱見畫白
澤圖釘在門上卽應聲曰白澤遭釘釘在門乃譏雲也
黃魯直有癡弟畜漆琴而不御蟲蝨入焉魯直嘲之曰
龍池牛壁蝨而未有對魯直之兄大臨旦見牀下以溺
器畜生魚問之其弟也大呼曰我有對矣乃曰虎子養
谿魚

以論語法言戲有官君子嘗見有官君子皆以舉錯爲
慮晦庵先生以法言章句戲之曰勢援上也文章次也
政事又其次也咸無焉爲選人其人大笑又見浙中官
員子弟詢趙守問及晦翁學術政事孰優守乃舉論語
篇章荅之曰學而第一爲政第二可謂善品題矣二者
之言雖曰戲謔亦可助笑談也

劉子贈人詩云惠和官尙小師達祿須干取柳下惠聖
之和師也達子張學干祿之事或有除去官字示人曰
此必蕃僧也其名達祿須干聞者大笑詩有詩病俗忌

當避之此亦偶自諧合無若輕薄子何非筆力過也

前惠崇能詩有其弟子犯師兄之嘲然杜工部有峽東
滄江起巖排石樹圓頃蘇子美遂用峽東滄江巖排石
樹作七字句子美豈竊詩者大抵諷古人詩多則往往
爲已得也

余靖兩使契丹虜情益親能胡語作胡語詩虜主曰卿
能道我爲卿飲靖舉曰夜筵設邏後盛也臣拜訖受賜也兩

朝厥賀

通好

情幹勤

重厚

微臣雅魯

拜舞

祝若統

福祐聖壽

鐵擺

嵩高

但可忒□□

無極

主大笑遂爲醺醵漢使有

盤水白狼詩譯出夷語殆不若靖真胡語也劉沆亦使虜便凌歷之契丹館客曰有酒如繩繫行人而不佳沆應聲曰在北曰狄吹出塞以何妨仁宗待虜有禮不使纖微忤之二公俱謫官

梅聖俞幼戲謝師直詩曰古錢裁詩句班衣戲木偶木奴今正熟肯效陸郎無師直小名錢木奴至十歲方悟宋太祖時同年數輩取名似姓者爲句云郭鄭鄭東東野絳馬張張夏夏侯璘熙寧初有云崔度崔公度王韶王子韶又有張君陳陳君張如以西門豹對東方虬也

王丞相云馬子山騎山子馬

馬給事字子山穆王八駿馬有山子馬之名

久

之人對曰錢衡水盜水衡錢

錢某爲衡水令

錢聞之大怒欲辨

其事對者謝曰止欲作對君實非盜也

王介素與荆公不相能荆公會題江寧道中驛舍一聯

云茅屋滄洲一酒旗午煙孤起隔林炊介鄙之書其末

云金陵邨裏王夫子可是能吟富貴詩荆公見而續之

曰江清日煖蘆花起恰是春風柳絮飛蓋譏其輕狂也

頭責文秦子羽云子曾不如太原溫陋潁川荀寓范陽

張華士卿劉許義陽鄒湛河南鄭詢此數子者或饒喫

無宮商或底陋希言語或淹伊多姿態或喧譁少智謀
或口如含膠餠或頭如巾齋杵而猶以文采可觀意思
詳序攀龍附鳳名登天府張敏集載此文曰余友秦生
者雖有姊夫之尊少而狎焉同時暱好有六人者數年
之中繼踵登朝無伐木嚶鳴之聲違王貢彈冠之義故
因秦生容貌之盛爲頭責之文以戲之并嘲六子焉雖
以諧謔實有與也

夔峽道中昔有杜少陵題詩一首以天字爲韻榜之梁
間自唐至今無敢和其詩者有一監司過而見之輒和

其韵大書其側而去後有人嘲之曰想君吟詠揮毫口

四顧無人膽是天過者無不笑之

竹坡詩話

熙寧初外學置長師職簡地親多在幕席徐有學長喜
醉語同學苦之詠蠅詩以刺之曰衣服有時遭點染杯
盤無日不追隨

鄭公在朝數爲御史糾劾疑時宰諷旨戲作青雀詩云
青雀孤飛毛羽單卑棲豈敢擬鴛鸞明珠自有千金價
莫與他人作彈丸

常待制秩居汝陰與王深父皆有盛名屢召不起雖歐

陽文忠公亦推重之其詩所謂笑殺潁川常處士十年
騎馬聽朝雞者是也熙寧初荆公當國力致之遂起判
國子監太常禮院聲譽稍減於前嘗一日大雪趨朝與
百官待門於仗舍秩寒甚不可忍喟然若有所恨乃舉
文忠詩以自戲云凍殺潁川常處士也來騎馬聽朝雞
石林詩話

添丁

盧玉川有示添丁詩云春風苦不仁呼逐馬蹄行人家
慚愧瘴氣卻憐我入我憔悴骨中爲生涯數日不食強

起行何忍索我抱看滿樹花不知四體正困憊泥人啼
哭聲呀呀忽來案上翻墨汁塗抹詩書如老鴉父憐母
惜摑不得卻生癡笑令人嗟宿春連曉不成米日高始
進一盃茶氣力龍鍾頭欲白憑仗添丁莫惱爺后村詩
話云唐人多傳盧仝因畱王涯第中遂預甘露之禍仝
老無髮奄人于腦後加釘焉人以爲添丁之讖或有好
事者爲之全處士於人無怨何爲有此謗然平時切齒
元和逆黨月蝕一詩膾炙人口意者翠奄以此害之

詩林

賀梅子

賀方回作青玉案詞有梅子黃時雨之句士大夫以其
句工稱爲賀梅子郭功父有示耿天鵬詩一首王荆公
爲書其尾云廟前古木藏訓狐豪氣英風亦何有後方
回晚倅姑孰與功父遊甚歡方回髮少功父指其髻曰
此眞賀梅子也方回乃捋其鬚曰君可謂郭訓狐矣以
其白髻而胡故有是語

竹坡詩話

岐王宮侍兒落髮爲尼

樞密張公穉仲喜談兵論邊事面目嚴冷而作詩有風
味岐王宮侍兒落髮爲尼公賦一詩云六尺輕羅染麝

塵金蓮步穩襯湘裙從今不入襄王夢翦盡巫山一朶雲殊可喜也

竹坡詩話

題林靈素畫象

道士林靈素以方術顯於時有附之者多得美官頗自矜而有驕色或有畫其像戲題其上云當日先生在市塵世人那識是神僊只因學得飛昇後雞犬相隨也上天

竹坡詩話

童謠

狄青爲樞密使時范鎮爲諫官人有相語童謠云漢似

胡兒胡似漢改頭換面總一般只在汾河川子畔以青
汾河人面有刺字不肯去云又姓狄爲漢人此歌爲是
人作不疑也欲鎮言之范曰此唐太宗殺李君羨事上
安忍爲適以啓君臣疑心耳

和杜正獻公

杜正獻公自少清羸若不勝衣年過四十鬚髮盡白雖
立朝孤峻凜然不可屈而不爲奇節危行雍容持守不
以有所不爲爲賢而以得其所爲爲幸歐陽文忠公出
其門下謝事居宋歐公適來爲守相與歡甚公不甚飲

酒惟賦詩倡和時年八十歐公嘗賀公詩云儉節清名
世絕倫坐令風俗可還淳貌先年老因憂國事與心違
始乞身四海儀型瞻舊德一尊談笑作閒人鈴齋幸得
親西席東向時容問治民公得詩大喜嘗自諷詠當時
人謂不惟曲盡公意雖其形貌亦在模寫中也

洛中言懷

司馬溫公熙寧間自長安得請畱養歸始至洛中以詩
言懷云三十餘年西復東勞生薄宦等飛蓬所存舊業
惟清白不負明君有樸忠蚤避喧囂真得策未逢厄辱

蚤收功太平。燭處農桑滿。羸取閭閻鶴髮翁。出處大節
世固不容復議。是詩雖以不合論而去。而神宗眷禮之
意愈厚。然猶以避煩畏辱爲言。況其下者乎。

不欺室銘

張忠獻公後爲王十朋作不欺室銘曰。泛觀萬物。心則
惟一。如何須臾有欺。暗室君子敬義不忘。果粟每訓予
及門人曰。學以祖爲本。禮以敬爲先。又曰。學者當清明
其心。默有聖賢氣象。久久自有見處。又嘗作詩云。羣凶
用事。人心去大義。重新天意回。解使中原無左袵。斯人

千古未塵埃朱文公跋曰舉大義以清中原此公平生心事也觀於此意可見其寢食之不忘然意不得遂其志可勝歎哉

西江月

辛幼安號稼軒宋寧宗朝擁節鉞奉身勇退以家事付兒曹作西江月云萬事雲煙忽過一身蒲柳先衰而今何事最相宜宜醉宜遊宜睡蚤起催科了辦更難出入收支乃翁依舊管些兒管竹管山管水

柳子厚

柳子厚與浩初上人看山詩云海畔尖山似劍鋌秋來
處處割愁腸若爲化得身千億散上峰頭望故鄉議者
謂子厚南遷不得爲無罪蓋未歿而身已在刀山矣
竹坡詩話

各有所志

元祐中起范蜀公於家固辭不就其表云六十三而致
仕固不待年七十九而造朝豈云知禮是時文潞公年
八十餘一召而來人各有所志也

寇準年三十餘宋太宗欲大用尙難其少準知之遽服

地黃兼餌蘆菔以反之未幾鬚髮皓白

呂晦表

熙寧四年呂晦表乞致仕有曰臣本無宿疾偶值醫者
用術乖方不知脈候有虛實陰陽有逆順診察有標本
治療有先後妄投湯劑卒任情意差之指下禍延四支
寢成風痺遂難行步非徒憚蹠盤之苦又將虞心腹之
變勢已及此爲之奈何雖然一身之微固未足恤其如
九族之託良以爲憂是思逃祿以偷生不俟引年而還
政嗚呼獻入之論可謂至矣

古歌解

古人歌行之作有四解五解六解之體如善哉行古詞云來日大難口燥唇乾今日相樂皆當善歡一解經歷名山芝艸翻翻倦人王喬奉藥一丸二解自惜袖短內手知寒慚無靈輒以報趙宣三解月沒參橫北斗闌干交親在門飢不及餐四解歡日尙少戚日苦多以何消憂彈箏酒歌五解淮南八公要道不煩參駕六龍遊戲雲端六解其後魏武帝作秋胡行有四解魏文帝作豔歌何嘗行有五解皆本之古詞云

息軒詩

東坡在儋耳題司命宮道士息軒詩曰無事此靜坐一日似兩日若活七十年便是百四十黃金幾時成白髮日夜出開眼三十秋速于駒過隙是故東坡老貴汝一念昔時來登此軒目送過海席蒙山歸未成題詩寄崖壁東坡復云無事靜坐便覺一日是兩日若能處置此生常似今年得年至七十便是百四十歲人世間何藥能有此效既無反惡又省藥錢此藥人人收得但苦無好湯便多嚙不下

對御歌

陳搏對御歌云臣愛睡臣愛睡不臥氈不蓋被片石枕
頭蓑衣鋪地震雷掣電鬼神驚臣當其時正鼾睡閒思
張良悶想范蠡說甚孟德休言劉備三四君子只是爭
些閒氣爭如臣向青山頂頭白雲堆裏展開眉頭解放
肚皮且一覺睡管甚玉兔東生紅輪西墜談麤云陳搏
隱武當山後居華州雲臺觀多閉戶獨臥或累月不起
周世宗召入禁中扃戶試之月餘始開搏熟睡如故

詩林

詠史

王梅谿集云婁師德教弟耐事弟曰人有唾面潔之乃已師德曰未也潔之是違其怒正使自乾耳余嘗詠史作師德詩云忤意由來勿校難誰能唾面自令乾直須事過平心後方服婁公度量寬余性褊急嘗欲書婁公傳於座右效古人佩韋之戒偶閱書遂錄其事昆弟朋友間有坐余失者宜書紳焉則事雖大於唾面心自然清涼矣

足疾

晦翁足疾得程道人鍼之而愈戲贈以詩云十載捱符

持短筇一鉞相值有奇功出門放步人爭看不是前來
勃率翁

蓮堂詩話卷下

終

仁和胡樹聲藏書 男 珽 校

吳縣 徐尙之

金匱 江文煒 同校

元和 徐立方

蓮堂詩話校譌

書中譌字不減庭齋然艇齋所引標明某書苟有疑竇
覆按卽知茲則未注明者十之五六校勘更難僅就同
人所見互相參訂不敢謂遽無遺憾也咸豐三年五月
仁和胡廷識

卷上三頁十八行

容自圖其忽誤原本作忽自圖其容

十四頁十五行

處字誤本作龍

十五頁八行

歐唐有黃滔無王滔然黃滔詩中不載此作

十七頁九行

懷舊二字與本條不相屬

廿一頁十二行點當作玷

廿二頁五行乃字誤六行西涼李光此必有誤按後涼呂光西涼李嵩李

歆無李光

廿三頁十二行盧全石請客詩石苔竹詩查皆不誤

廿四頁三行庖當作魚

廿九頁三行葉原本作案今依山谷集改

三十頁五行一品夜誤本作一品衣

卷下二頁按五老會十行報補誤原本姓各不誤

三頁按耆英會二行西都或作東都非

四頁

原本真率會姓名
脫落錯謬今訂正

六頁二行

作夜誤原
本作昨夜

七頁十四行

磔當作磔唐詩鬢如蝟毛磔準此
則上旬當作長身玉立方相對也

九頁十五行

水字誤
本作木

十五頁十三行

若疑當作苦
輩疑當作筆

十六頁四行

國宛誤原
本作宛國

十七頁十六行

大譜誤原
本作大將

十九頁五行

僧字誤
本作曾

七行

事字誤
本作市

廿三頁十四行

寅疑當
作寅

廿四頁十二行

時郎誤原
本作侍郎

廿六頁二行

按唐憲宗無咸通年號當作懿宗

七行

世世誤原
本作世所

廿八頁五行

虛厚誤原
本作處厚

三十頁十四行

訛字誤
本作書

三十三頁十六行

青陽當
作青楊

三十四頁八行

白頭誤原
本作頭白

十一行

求字誤
本作來

三十五頁十三行

去字誤
本作雲

三十七頁一行

水字誤
本作木

九行

也字下不
可乙住

十八行

饗
吃

二字見漢書
今誤作喫

四十頁十五行

塵字誤
本作塵

四十二頁十一行

然意當
作然竟

四十三頁十八行

人當
作公

四十四頁十四行

昔當
作息

蓮堂詩話續校

會稽鏡吾氏董金鑑輯

卷上一頁九行

驛字誤
氣作澤

六頁五行

嵌句
非誤

八頁十行

相字誤
原作湘

十頁十二行

詞部當
作禮部

十三頁十六行

蓬當
作蓬

十七頁十一行

帶酒疑
作帶酒

十八頁六行

口疑
作鶴

十三行

類字有誤
疑作貧

十九頁一行

贛留
作贛

二十頁二行 思字有誤疑作帥。兩空格當作氣色二字見唐書李光弼傳

卷下一頁十三行 侍字誤原作侍

七頁四行五行 通字兩押必有一誤 十行 詩起偈三字有誤薛逢事詳見下卷

三十頁十五行 關當作關

十頁十三行 古下當有詩字下文俗諺全語與古詩一句正相對

十四頁四行 苔柳河東集一本作蒼 五行 雜當依柳集作離

十五頁十行 低當作底艇齋詩話不誤可證

十六頁十三行 汚疑當作坊

十七頁一行 聞道與上句舊聞字重意亦複恐有誤當攷蘇東

二十五頁十五行 詞字誤 原作嗣

二十六頁六行 案與潘三云云卽東坡詩題也此世用作標題而詩話中並未敘明

轉令讀者茫然不解所皆當於標題 十三行 案送兄子

上如東坡二字下節題首例與此同 十七行 前詩下常有韻字謂用東

坡與潘三詩韻也觀上條可知

二十七頁二行 案此條採石林詩話余大父客也

加葉石林云四字方有分曉本書十五頁引艇齋詩話德業嘗爲余家丞相館客云云亦於篇首加

曾艇齋云四字

例正與此同

二十八頁十行 宋尚詩當作宋尚書

二十九頁十六行

差新刻謬差今已改正誤加△

十八行

按送鄭萃云云

標題上亦當加歐公二字說見前

三十一頁十四行

輾當作輾輾然笑貌亦作輾音軫

三十三頁五行

城當作成

十六行

參胡氏校謬云青陽當作青楊蓋疑形聲

相近而誤今攷疑齋詩話載此詩作青煙人幾家當依之校正

三十七頁十七行

頭責文秦子羽云案此句有誤當作頭責秦子羽文云

三十八頁一行

謀疑當作謂方合韻謂音胥上聲玉篇云才智之稱也俟再攷

一行

是當作似又前三十七頁十六行恰是春風柳絮飛亦當作恰似

四十頁三行

孤當作孤

四十二頁一行 蚤字與上句複必有誤當考本集校正 五行 後當作浚

四十六頁一行 持篇

附補校

卷下五頁十二行 語句二字誤疑當作語忌亦見下十八行

三十一頁十五行 張思厚思當依東坡詩集作師

三十七頁五行 木偶疑當作木奴與九行 胡氏校

字下不可乙生案新刻未加○記應補